

Ops Sapu Gempur: Imigresen tahan 45 pendatang asing

Johor Bahru: Seramai 45 warga asing ditahan Jabatan Imigresen Malaysia (JIM) menerusi Ops Sapu Gempur di Taman Mount Austin di sini, kelmarin.

Pengarah JIM Johor, Datuk Mohd Rusdi Mohd Darus berkata, operasi bermula pada kira-kira jam 12.30 malam membabitkan 30 pegawai penguatkuasaan.

Beliau berkata, serbuan dijalankan hasil risikan dan aduan awam berkaitan kehadiran pendatang asing tanpa izin (PATI) di rumah kedai terbabit.

Menurutnya, mereka didakwa bekerja secara haram di kawasan terbabit.

“Ada antara mereka bekerja di kilang serta kedai makan di sekitar kawasan itu.

“Serbuan mengejut itu dijalankan ketika kesemua warga asing sedang berehat di rumah kedai yang dijadikan sebagai tempat tinggal.

“Sesetengah mereka cuba melarikan diri serta bersembunyi di dalam bilik mandi dan atas siling namun berjaya diberkas,” katanya dalam satu kenyataan, semalam.

Menurutnya, mereka yang ditahan terdiri daripada tiga lelaki warga Indonesia, sembilan lelaki Pakistan, tujuh lelaki India, 19 lelaki Myanmar, seorang bayi Myanmar, lima wanita Myanmar dan seorang wanita Indonesia.

“Hasil pemeriksaan mendapati mereka tidak memiliki dokumen perjalanan yang sah serta ting-

gal melebihi tempoh yang dibenarkan.

“Mereka yang ditahan berusia dalam lingkungan sembilan bulan hingga 46 tahun.

“Kesemua mereka disyaki melakukan kesalahan di bawah Akta Imigresen 1959/63 dan ditempatkan di Depot Imigresen Setia Tropika untuk siasatan lanjut dan tindakan selanjutnya mengikut peruntukan undang-undang,” katanya.

“Hasil pemeriksaan mendapati mereka tidak memiliki dokumen perjalanan sah”

Mohd Rusdi



BANGUNAN rumah kedai dihuni pendatang asing tanpa izin di Taman Mount Austin diserbu anggota JIM Johor.